

槐

廳

載

筆

槐廳載筆卷十五

國子監祭酒法式善編

夢兆

王涓來少宗伯說劉修撰克猶好中明崇禎庚午舉人困於公車至順治己丑赴會試初入京居黃岡會館是夜夢一神人自空而下類人間所繪畫魁星者連呼狀元劉驚起遜謝顧曰數定矣何遜謝爲是科遂捷南宮殿試果及第第一旣入翰林又一夕夢人告曰君雖狀元及第然官不過五品年不過五十時遇

覃恩加一級爲從五品急請告歸歸未久病卒年四十有三卒時命家人洞開窗戶仰視曰天樂迎我我逝矣又曰我東華真君第三弟子也今召復故位耳劉生平力行功過格制行不減

古人錄

甲戌科經房得人最盛者翰林院檢討彭直上始擢鼎甲二人胡

任與顧悅履庶吉士四人黃龍眉黃中理周起渭殷元福也直

上鄧州人故布政使禹峰述而子諸生時執經於予任與以辛未

受知於予俛得而復失之後知爲任與名解元也惋歎彌日今

乃受知直上信遇合有時文章有神也聞任與少時嘗夢登高

山手摘香櫟二枚自吟詩云手弄雙元小天下至是果驗胡辛

酉江南解元上

門人丁丑狀元李蟠仙李徐州人孝廉時常夢神人衣冠甚偉

手一合子付之其中有黃金絲糾結如字形令諦觀之乃狀元

二字也至是果及第上

喬進士夢蛟自言十四五時將應童子試夜夢一人如俗畫張

仙者謂曰汝欲登第須與某同榜宜切記之驚寤隨識簡端喬  
長予一紀予雖生尚未命名也自後每遇試必遍覓賤名不可  
得歲庚辰余補博士弟子員喜曰果有是名有是人矣至順治  
辛卯喬中式戊戌提南宮余於甲午鄉薦疑此夢不足據及辛  
丑僥倖遂爲殿試同榜竟符所夢云喬君樸實人近偶談及余  
不甚信因出所識歲月雖久墨跡宛然乃知窮通得失信有定  
數天下事又何足預計耶

三岡  
識畧

建德馬生某應癸卯秋試已鎖闈提調撫軍朱公倚几假寐夢  
神告曰天榜有馬天選者尚未到朱曰門已封矣奈何及天明  
有馬生因卷損求易朱忽憶前夢急以卷與之囑令改名天選  
并親加封印榜發果中式藩司及學使者皆莫知其人公具述  
所自咸嘆異之見祝氏卮言

同上

大名黃之昇與交河王琯同赴公車一夕謂之昇曰夜夢天榜會元姓黃其名模糊不暇詳視可預爲子賀矣及榜發之昇僅登榜魁而元乃崇明黃君仍緒也

同上

壽州葉甲丁酉中式第七後緣事改名湢入學補廩康熙戊午金陵鄉試語同寓休寧戴錫蕃曰吾夢塲中首題是點爾何如一節併囑其從遊王宅三王鑑各作一藝戴以舊題熟擬未必出置之是科首題抑爲之不厭三句夢弗驗也越三年辛酉二王復科舉戴又與同寓因問其師葉則去年七月作古矣是科首題果點爾何如一節出場時二王相告以爲異是科戴中副車

懷秋集

順治己亥秋八月再行會試予與同年朱若臣士綬同公車若臣夢看榜首姓朱單名是金字偏傍左邊不甚了了予笑曰年

兄未必便中會元得無爲他人作夢耶若臣具呈禮部改名銘

榜發會元朱錦

寄園寄所寄

何容筮巡按重光未第時夢其父曰汝功名在朝天宮某道士身上覺而信之訪其人訂交焉旣而辛卯金陵填榜卽某道士也試官折卷到筮名方訝其姓欲易之而道士聞唱名時直書其姓名遂得不易

同上

里有徐生者少負時譽讀書於光德巷中一夕夢神曰我有文七篇在我座下今科場題也子熟記之可膺首薦明晨往視果有文七篇在焉朝夕記誦無遺及入場七題無一爽者和墨揮毫茫無一字記憶信筆終場揭曉無名及閱解元卷卽神座下七篇也生遂終身寥落徐生者余爲童子時習知其武斷於鄉其或有遺行而失之者歟

見聞錄

康熙癸酉秋海鹽徐岫年偕其姪容赴省試後詣子墳祈夢是夕容夢忠肅公問汝祈何事曰敢問秋闈中否公顧吏曰持文冊來既至閱畢謂容曰汝中式矣示以冊面上批清晰二字且曰歸語汝祖吳三桂一事當報汝甲第也醒語其叔亦不解所謂既而榜發容果入彀謁其本房閱卷中批語並無清晰字樣及主試刻試錄進呈選容春秋墨義一篇其批適於夢合因共駭然而終不晤所謂吳三桂者復詢其祖時年已及耄亦茫然不記久之嘆曰是矣此事汝父亦不知之吾曩有僕姓吳有婢名三桂因通姦汝曾祖治之幾瀕于死吾力爲解勸卽以三桂配吳已三十餘年矣不意爲神明所鑒貽福於汝冥冥之中因果殆不爽也容字介臣中丁丑進士尚在重慶食報未有艾也

俞叔音言

信徵錄

李子靜學士少隨其父如石先生官於吳遇國變不能歸獨僦  
居錦帆涇側館於鄉間柴氏柴氏子世俊夢入玉京試得狀頭  
師得榜眼以告子靜子靜心喜自負因拆榜眼二字之半合爲  
根字改名仙根仍回原籍應舉辛丑傳臚果中第二狀元則馬  
世俊也柴本姓馬名偶符耳如石先生名實癸未進士明末爲  
吳縣令著有賢聲鼎革後杜門著書不以子貴易操方巾布袍  
終其身

終其身

近一生科舉祈夢于公夢公以治生葫蘆一枚示之落第後每  
科舉每夢葫蘆漸大見之則必落第是生潦倒積七科矣又當  
就試復夢公出一人大葫蘆示之生意悶絕及入闈見夾號兩  
少年一曰胡一曰盧放榜與之俱雋蓋生初夢時葫蘆始生等  
其大等身方得中式此與相傳一夢絕類一生每試必夢油漬



其首往往落第後科試已畢放榜之夜恐復見前夢約與友人  
飲酒達旦將曉一蒼頭假寐大叫而醒眾問其故曰方倦合眼  
見一人挈油瓶注我主人頂上故夢與之爭生聞言大慟俄鑼  
聲疊至哄報中式吏人不戒填榜時瀆一油點於其姓上向來  
之夢始驗

湖壩雜記

康熙近科一上舍行之于廟祈夢遇其鄰人自廟中出因告生  
曰我爲子嗣祈夢神囑我往問解元生曰若何所夢鄰曰夢得  
瓜子一撮生曰君無子矣瓜旁一子非孤字耶其人大恚曰我  
問解元何用爾語生祈夢竟無夢放榜日其鄰預立榜下待問  
夢兆及開榜第一名卽生也無夢而有夢一夢也兩兆之矣  
海寧楊少司馬雍建甲午北京鄉試闈中夢見一人提燈籠大  
書兵部二字照之不去是科中式次年聯捷尋以行取授兵科

給事嘗曰得無功名止此耶或曰兵科非兵部君請勿疑既仕至貴州巡撫每以前夢爲疑夫人曰安知不更遷兵部耶後果遷兵部侍郎其孫守文爲余言

職園雜記

松江丙午孝廉金維寧戊辰會試初場交卷天尚未明於明遠樓下遇宮詹沈繹堂先生曰先生何以在此繹堂曰吾以生平無過上帝命吾爲文昌祿宰司科甲之職忽不見而主考徐健菴先生夢見繹堂明日得其令嗣宗敬卷中式

述異記

劉克猷初登鄉薦夢一人語之曰爾須朱之弼做房考方中春榜及到京時偶出寓散步見數童子攜書包經其門一童子最秀出遂拉其手與談見書上寫學名乃朱之弼也大驚隨之至其家見其父乃開柴廩主人因與欸曲將筆墨數事贈之後遭流寇之亂屢次不赴春官及己丑會試朱公已爲禮垣分校得

首卷卽克猷也又康熙壬戌金德嘉在楚作教不肯會試俄夢  
劉克猷以門弟帖拜之因北上是年朱公禮闈總裁而金儼然  
會元始信夢兆之異

同上

泰州宮懋言中康熙癸未榜十八名爲詩四房李編修鳳翥首  
卷其祖偉鏐中崇禎癸未榜十八名亦爲詩四房李翰林士淳  
首卷當懋言公車北上夢祖與之履喜曰是繩祖武之兆果符

其言

西陂類稿

無錫鄒忠倚舉進士第一徵時游錢塘祈夢于于忠肅祠忠肅  
授以瓜子一握數之得五十四粒後閒居其夫人偶以瓜子作  
狀元二字忠倚見之而悟數之如前數壬辰旣舉南宮第一癸  
巳復考列詞臣第一時呼兩狀元

查浦輯聞

李漁村名澄中諸城人康熙壬子拔貢生不利秋試一夜夢人

持二冊子示之曰此鄉試錄內無君名彼乃有君名睇其上有特恩二字卒以鴻博入詞館少與劉子羽稱石交子羽見薛臣八才圖謂貌似李于鱗君亦嘗夢人授一卷文字曰此汝作也醒記數言是于鱗華山記中語乃恍然自失焉

紀城文稿

翰檢貴陽周起渭以康熙乙酉奉

命典浙江試既入浙境夜夢有神人衣冠捧黃裏至其前問之曰此今科吉祥榜也比發榜第一人爲詹銓吉殿榜曰戚麟祥果符其兆焉

陳光亭雜記

鄧林梓字肯堂邑人也順治丁酉將赴省試祈夢于韋蘇州廟神示以中式力田四字肯堂竊意是科可中但當從此知止歸老田間無望科甲矣迨榜發邑中陳溯潢父名式力田者合之

爲男字言中式男鄧無分也

柳南雜筆

歲戊午嘗宿錢塘江夢兩水物從沙壩中扛金字榜出立舟前  
蓋三夕而三夢其一則上元甲子四字也茲以壬申恭遇

慈寧六十萬壽恩科金榜獲名乃徵先兆

薛石菴詩集注

李又聘先生言昔有寒士下第者焚其遺卷牒訴于文昌祠夜  
夢神語曰爾讀書半生尙不知窮達有命耶嘗侍先姚安公偶  
述是事先姚安公喟然曰又聘應舉之士傳此語則可汝輩手  
掌文衡者傳此語則不可聚奎堂柱有熊孝感相國題聯曰赫  
赫科條袖裡常存惟白簡明明案牘簾前何處有朱衣汝未之  
見乎

潯陽消夏錄

蕭山韓其相先生少工刀筆久困場屋且無子已絕意進取矣  
雍正癸卯在公安縣募夢神人語曰汝因筆孽多盡削祿嗣今  
治獄仁恕償汝科名及子其速歸未以爲信次夕夢復然時已

七月初旬答以試期不及神曰吾能送爾也寤而急理歸裝江  
行風利八月初一日竟抵杭州以遺才入闈中式次年果舉一

子焉

我如是問

汪編修守和爲諸生時夢其外祖史主事珥攜一人同至家指  
示之曰此我同年紀曉嵐將來汝師也因竊記其衣冠形貌後  
以已酉拔貢應廷試值余閱卷擢高等授官來謁時具述其事  
且云衣冠形貌與今毫髮不差以爲應夢迨嘉慶丙辰會試余  
爲總裁其卷適送余先閱復得中式殿試以第二人及第乃知  
夢爲是作也

續錄

乾隆甲午歲河南臨潁陳翁有子某爲名諸生時方鄉試翁于  
家營建客廳廳忽折一梁差人於鄰村尋買翁鬱悶晝寢工匠亦  
偶無事假寐夢至數里外一集市見有奔走匆忙者如報錄人

狀匠問曰汝報錄人乎其人曰然匠曰某村陳秀才曾否有名  
其人曰有之匠曰汝不識路逕吾爲導引至其家何如其人言  
不敢煩勞自當得星而往匠曰于夜間報之乎漫應曰然醒言  
于翁翁亦與同夢及客廳落成署匾因係陳姓又以夢徵額曰  
德星堂用太邱故事已而榜發竟無名以爲夢不足信及丁酉  
歲始捷闈中詩題爲德星聚主司項太史家達戚民曹蓼生一  
爲德清人一爲星子人德星之說蓋驗于此

水曹清  
暇錄

江南太學生顧某雍正壬子應試北闕夜夢人謂曰子南榜孝  
廉也宜速歸醒而喜甚時屆七月中旬恐已過錄送期憶素館  
八座某公異學使有舊乃乞其書星夜南馳抵金陵遇夏君之  
蓉居秦淮河上形容頗頽問之曰學使遣名祈補無策獨步河  
干聊自遣耳但君應京兆試何以來此顧言其故夏懇於書中

增已名許之書入二名俱補錄迨榜發夏高中顧竟被落

秋燈叢話

江西周力堂先生應雍正癸卯鄉試主司何淡菴先生闈中屢

夢人謂曰三男作解元以爲其子登科兆是時周試卷已被房

考塗抹棄置矣何定榜首無愜意者搜得之深加讚嘆謂章羅

復出閱卷面則男字三號也悟前夢遂取冠多士

同上

又某省有書吏夢其子中若干名入闈書榜將至其處驚喜交

迫不能執筆監試怪而問之以夢告恐其暗通關節託辭於夢

者易其卷並更他吏填寫及唱名訖吏躍然曰此真吾子也

同上

海寧陳孝廉遇堯乾隆壬申恩科赴禮闈夢二友造訪乃浙

江王子及江南甲子兩孝廉也方欣然道故忽喧傳寇至陳倉

卒欲踰垣走甫舉足卽騰身霄漢間而墜失一履頃見二友招

之下遂拉與偕往覺天氣昏慘不類人世頓悟友故已久何得



至此叱之而醒以告同人咸不解而陳每疑爲不祥場畢董曲  
江聞其事謂人曰陳子捷矣或詰之云今科首題君子有三畏  
節乃壬子浙省所已出者次果能此道節又與江南甲子同題  
聞冠生屢非三題業屢弗得之意耶至置身雲路當爲飛騫之  
兆但與泉下人相周旋恐享年不永耳榜發果雋不踰歲竟赴  
玉樓之約矣同上

乾隆甲子江西鄉試康公五瑞於考官入闈時不覺見獵心喜  
夢已亦與試中三十五名及榜發三十五名則張五瑞南康人  
也張與康同名而夢先兆之奇矣同上

中州有士人某入闈神思瞽亂竟日不成一字及夕夢人謂曰  
汝若做一字便不能中矣醒而不解其故至次日哺猶未成稿  
忽聞鄰號大呼可惜者再驚往視之則卷面爲墨所汚其人

面色如灰慨然嘆曰余諸作頗費經營惜時迫不及易卷君如  
不棄願以相贈某喜而受之及榜發中魁選越數日同號生來  
賀云君必有大陰德故造物令我爲君捉刀也某曰生平無他  
長惟某年月日山行天將晦見少婦策衛而馳忽失足墜澗中  
呼號無應者彼時急於拯溺不但不及於亂卽邪念亦未敢萌  
送至坦途而別同號生憮然爲間曰噫此天罰我以報君也先  
是婦以情告夫夫疑莫釋遂離之蓋卽同號生之妻也時其婦  
尙未改適歸而親迎焉

同上

范浣浦咸雍正癸卯聯捷入翰林先是夢得泥金賀帖有齊第  
五三字鄉會首題第五字皆齊字子華使于齊一節道之以德  
齊一節咸安宮學生向少科第浣浦謫官充教習丁巳觀補亭  
德定圃先生李質穎諾敏皆聯捷館選一時稱盛

石城齋  
雜錄

益都馮文毅公溥先考功座師也崇禎己卯登賢書報至方熟  
睡家人呼之不醒太夫人大驚令扶起以水噴之夜半方晤云  
夢登泰山雲氣蓬勃擁之而行回視五大夫松十八盤三天門  
厯厯如向時所見至則結一席殿縣錦繡于門衆樂齊作酒肴  
咸備碧霞元君親領衆仙隨之成禮將退適聞鷄鳴海中紅日  
如車輪湧出遂驚寤寤時猶帶酒氣公燕臺雜感云曾登嶽麓  
讌天門縹緲霓裳醒夢魂跨鶴仙人傳玉竿驂鸞侍女奉金根  
秦松龍蛻鱗含雨漢碣苔封篆有痕欲溯滄桑尋往事海波澎  
湃湧朝暎蓋紀其事也又於康熙辛酉七月夢一人欲求見亟  
整衣冠出不見一人但見羣犬亂吠似有物昇之行行數里見  
道旁卧一石牛大如象狀亦不類世間牛一人執鞭語云此觀  
音大士送汝乘者遂乘之牛卽起立行步穩適至一處茅屋數

間馮下牛入門見一老僧彼此不爲禮但語馮云汝自今慎諸  
莫思議因指壁間畫云譬如畫樹卽是樹水卽是水石卽是  
石何用思議馮云師所見止此抑尙別有僧亦不言第以指云  
途尙遠好事儘多旁復有一僧以拂指云汝非凡人馮笑云誠  
如君言大士送牛尙在遂別去過一牌坊候牛不至馮呼之來  
別有一牛狀相類因相逐而走馮云汝去余何所乘旁忽有勇  
夫手執磬槌擊之牛咆哮作吞噬狀其人將磬槌寘牛口中牛  
卽俛首順從其人牽之至馮復乘之行數里至村店僮僕數人  
候馮云飢熟馮乘牛入店卽寢紀以詩云不犯禾苗露地牛餐  
風卧雪幾經秋本來草料無教少認得家園卽便休

種李園  
詩話

翰林某供職京師有子年幼聰俊意其不凡夜夢神謂曰爾子  
科名須馬世俊領榜覺而訝之一日偶倚門首見一總角童子

狀貌岐嶷挈書篋過其前將就傳取帙姓名恰爲馬世俊心詫其異隨訪之家徹貧使人招以來與兒同習舉子業相得甚歡聚處有年馬忽以病歿翰林乃怛然心傷謂疇昔之夢殊惡馬旣天兒可知也後數年其子登第狀元果馬世俊也吾嘉許潛壺自俊宿學能文崇禎癸酉舉人屢躋春闈與蘇郡繆封翁某友善嘗至其家言及下第輒歔歔不自勝封翁子方數齡適在坐慰之曰許伯無憂我中爾封翁叱之止嗣後潛壺頻試輒蹶而封翁子以妙年及第官修撰康熙庚戌得列房考潛壺以是科成進士正出繆公房年七十距鄉舉三十八年矣揭榜偶至他寓友賀之潛壺曰進士之願遂矣奈出小繆房何繆公適坐內趨出曰許伯父小繆在此潛壺頓首謝有赧色由此觀之科名遲速數定之矣不可強也康熙丁酉先君子省試于京兆與

鄒先生升恒同寓試後俟發榜共約骰百擲六子皆紅者中頃  
之擲至百皆無先生憤猛以骰擲盆中得五紅其一軼出舉燭  
尋至牆邊骰亦紅狂喜供于几夜半聞報聲不絕而寓中寂然  
以爲骰不足憑也黎明報至則中爲南元質直談耳

執丈戴勾齋先生彬粹學恬淡乾隆丁酉科未赴省試八月初  
一日夜夢入棘闈諸生立階下上坐朱衣人有頃一綠衣老者  
至與朱衣並坐語良久命題各給一綠玉簽書姓名其上交簽  
置大簾中擾亂之朱衣人向簾中取一簽階下喧傳榜發唱名  
解首吳一騏第二嚴謙第三卽唱先生名醒而異之是科解首  
第二果符夢境第三則杭州戴檀也姓同名之木旁亦同然非  
一家兩不相識入于夢中感此應彼不可解也或爲先生是科  
當發解以未入場故易人耳

淮海錄

元和施陸錦江南庚子解元是歲元旦本路門斗至賀曰相公  
今歲高發矣笑詰之曰早晨郡廟進香見神座一榜首列尊名  
故來報喜至期諸生束裝應試施無科舉且貧欲不去門斗促  
之且曰相公所慮盤費我本送考同往可耳錄遺案三續施竟  
無名快快欲歸會有某秀才游兩廣督署夜夢一神語曰江南  
無解元待汝去醒後自思考期已近錄科不及遂置之次夜夢  
前神怒曰汝不去江南無解元矣某爲主人述之主人以驛馬  
贈送到江寧已八月初五日文宗知某一時名士卽與施名補  
出入場頭場題爲歲寒一節施曾以是題擬作文意頗自得有  
友人同號忽握卷至施前曰尊作已錄卷君可更作施無可如  
何勉搆新藝是科施竟解元某與友不售

廣新  
聞

吳門長邑舉人陳堯叟雍正癸丑年將赴會試夢至一所官闕

壯麗遙見殿上坐一王者兩旁隨侍甚衆正窺伺間忽聞呵聲  
隱隱旋見一偉丈夫鬚髯若神從中門進陳雜於護從中隨入  
王者出迎分賓主坐客問曰今歲會墨若何王曰君少坐我爲  
誦之自第一名至十八名爲君難二句題文陳詢之從人曰此  
文昌帝來者關聖也陳素穎醒後猶歷歷可記卽披衣錄出曰  
將元卷誦熟入場題目果符元卷杳不能記一字勉強草就自  
度功名無分有友同號者以文相質閱至二行卽賀曰君作第  
一人矣友問故陳細告之且掩卷誦下篇一字無錯友大駭曰  
十八篇文君皆能誦否曰當時意在會元餘文皆已忘却後榜  
發陳中十八檢舊所錄對之悉合後視魁墨無一卷悞者同  
海寧祝琦康熙丁巳科解元也場中題是譬如爲山一節出場  
後覺通篇得意而中二股有數語未愜夜夢至文昌殿中帝君



上坐旁列爐竈甚多火光赫然祝問何爲旁判官長鬚者笑曰  
向例場屋文章必在此用丹爐鼓鑄或不甚佳者必加炭火鍛  
鍊之使其完美方進呈上帝祝急向爐中取觀則已所作場屋  
文也所不愜意處業已改鑄好矣字字皆有金光乃苦記之一  
驚而醒意轉不樂以爲此心切故耳安得場中文如夢中文耶  
未幾貢院中火起燒試卷二十七本監臨官按字號命舉子入  
場重錄原文祝入場照依夢中火爐上改鑄文錄之遂中第一

同上

秦簪園名大成與其中表某赴會試夜夢至文昌宮中適關帝  
至問今歲狀元何人文昌以某對忽見一婦人跪帝前云某爲  
我夫弟夫死後某凌虐備至憂鬱致死文昌曰此人短行奚可  
大魁天下特上帝選才甚難殿試已近誰可易者關帝曰查後

科何人易之申奏未遲有一吏捧冊跪進文昌曰今歲且以秦大成爲狀元惜功名豫得未免減算耳是歲秦果第一某竟落第未幾死簪圍主講平江書院每舉以爲諸生戒

同上

丙午鄉試前二月顧進士禮琥夜夢在護龍街見一牌樓上書張祖勲三字傍一人語曰過此可中矣醒後自思已中此夢何因向其徒黃一機述之黃曰此乃長洲學生機友也告于張張甚喜後竟頭場貼出掛名大公坊已酉科乃爲江南第一

同上

李石渠殿圖嘗夢人語遇亨而通不解所謂乙酉出劉侍讀亨地房丙戌出盧學士文昭薦中撥入紀太僕復亨房而夢乃驗

遂由翰林科道廉訪閩中

秋坪新語

晉曲沃拔貢李弱侯宗鄴於乾隆戊午科鄉試場中夜夢張榜已身中解元視其名上下二字分明中間一字模糊醒以語人

乃放榜則榆次李鄴也可見事屬前定未免睡魔弄人李後舉

乾隆己卯科鄉試

聞見錄  
香錄

乾隆戊戌科江西戴蓮士修撰衡亭大魁天下是歲元旦有人夢見天榜狀元初則常州奚某也既而易戴聞空中語曰奚某之父病其聘媳貌陋不足以爲子婦卒休之戴之外舅恐女形醜求他擇戴父子卒不許夫婦大倫其設心爲何如也故黜奚

而易戴

二雲山房贊筆

乾隆甲子桐鄉陳宗達鄉薦其父于揭曉前一夜夢人倒提一

大鼠首至其家占之疑末一名也報至果然

春水居筆記

叔祖稼村先生源亨雍正壬子孝廉乾隆丙辰應禮部試未移小寓入場前一日雨因投友人沈君寓就宿沈不納懇之而怒曰奪吾南宮矣怪而詢之則沈昨夢一異人頭戴土手執戈入

室刺之解字卽戴也同人強之遂留榜發沈果下第後知沈卷  
同房同薦總裁于中式時將二卷比較卒棄沈卷果符所夢

日抄

武進李梧陽先生名瑞岡乾隆癸酉科江南鄉試甫入闈有同  
鄉友王某先在號俄而奔告之曰頃假寐間夢此號中李五全  
必中吾遍訪同號李姓有三無名五全者梧陽先生應之曰如  
是我中矣我卷上却有五全二字蓋時方各習一經有習五經  
者則卷面另注五全二字先生習五經者也榜發果中式先生  
初名煒果應童子試不售癸亥元旦有好友劉珂園先生名琛  
夢見黃榜中有李瑞岡姓名旁一人指而告之曰此汝友李某  
也今年當進學矣覺而告之李縣試卽易瑞岡名是年果入泮  
至癸酉捷鄉試庚辰捷禮闈入館選先生自序云題名偶爾兆

每在好友夢中豈定數耶

紫垣隨筆

太倉貧士喪偶遺一子九歲攜赴金陵應鄉試其子自隨父出門想欲從入場未敢啟口而心神專壹無時或釋士至白門寓淮清橋畔入場以子託房主照應頭場畢歸寓房主迎門告曰自先生進場令郎酣寢不醒似夢魘然頃甫起盥洗矣怪之則曰與父同出場耳父詰之謂父點名領卷入龍門時墨墜不見兒同尋覓得之異其言確詢乃細述入場時見無數青衣吏卒簇擁一大轎至禁不許前轎中人審視良久曰穉幼無妨也然後敢入閒游東西號舍無不周徧頻視父所坐號問食求湯置不答傍晚聞散紅燈隨卒行每號插在一檐有多有少甚至空無所插者父號亦插一燈詢卒云是新科中式士子心甚喜旣而一號檐插有二燈又問之云此乃解元也向其人問姓氏籍

貫實不答特認識其狀貌耳父以爲夢境何足信三場竣束裝赴水西門外搭船欲歸子隨後牽父衣低語曰前所行者掛雙紅燈者也趨與周旋各道姓名子亦叩見談次將夢中所見述之其人曰我有女九歲如彼此俱不中或有中不中則已倘得同榜當締姻訂期十月朔赴江陰學使署填親供時相晤榜發一元一魁如約往江陰倩同年二人蹇修成禮遂傳爲佳兆

南甯雜志

襄城劉太乙先生青藜康熙丙戌翰林鄉舉前一年夢人持一簡題云太昊陵邊思故鄉兒女織錦千丈長那解刀尺作衣裳謂先生曰此明年科題也先生熟思久之曰其子在陳章乎覺而異之詩以紀焉文通授彩筆子雲吐白鳳古來瑰偉人奇怪事頗衆而我獨何爲廋語偏入夢覺來味厥旨反覆轉悽悽十

年走名場銳氣消磨確伯倫醉不醒  
嗣宗腸常慟攘臂復何心  
鬼神乃嘲弄抑豈憐我拙客居如  
驕控發矇指迷途詭語示微  
諷晨昏離庭幃甘旨缺親貢衣給  
陌上桑葦盈屋角甕豈必舌  
爲耕始足免飢凍中宵坐且起歸  
心勃然動敢以金石言蕉鹿

等膏曹

梧門詩話

槐廳載筆卷十六

國子監祭酒法式善編

因果

延陵巢震林壬辰禮闈中式一百六十二名以他事被革落覲歸不復以進取爲意友力勸不得已再上公車及榜發則仍一百六十二名也夫名次前後尚一定如此人豈可徼倖非分也

三閩識畧

順治丁酉科豫章一士子入闈中作文繕寫已畢甚覺慊意忽見魁星跳舞其前曰汝今科狀元也可書狀元二字于我掌上士子大喜促筆纔書一狀字魁星倏以手反撲印於卷面而去此卷因是不得騰進蓋士子頗善吏筆也

詞菴偶筆

吾邑王觀予有俊才童時讀書僧寺見廡下木像斷爛仆地戲



湯其首夜夢神怒曰汝不過舉人縣令敢爾無禮逾五年補諸生鄉試值號舍有同庚生者吳某月日時悉合定交闔中是歲吳中式王被放終以窮老悔艾無及每舉以戒後生吾友黃圮公親見其言如此

矩齋雜記

壬辰予與吳道南沈禹玉會試共寓都城義眉寺予語道南曰參乎全章題曾揣摩否道南曰未也時已二月初六將進闈矣道南晚作此題文止三百餘字予爲評隲訖語曰予一時未能收束作短篇不能與兄同門也及至小寓將進場時同在炕上予偶云道南昨作參乎章好甚同人取閱而禹玉注目多時予諷之曰君欲抄其文耶何閱之久也予與道南禹玉卷俱在王公舜年房內道南中式批予落卷有人患才少君患才多再一整鍊自拔前茅語禹玉已得復失閱其落卷卽次題參乎全抄

道南新作因雷同而黜道南初謁房師卽云場中兩卷俱好  
二題重複鄰房李公曰云旣抄時文何不兩棄王公云必中其  
一心乃安李爲拈闌乃得吳而棄沈子曰此有天道存焉喜以  
文請教人及好抄人文者均當以是爲戒

寄園寄所寄

陸孝廉名在新字蔚文蘇州人順治乙酉夏至虎邱見一幼兒  
啼哭問之曰九歲揚州人姓韓過江爲

大兵衝失陸卽裹糧送往時僵尸滿道步至鎮江徧覓韓氏舟  
還之其父母感泣是年陸父病篤夢朱衣神曰爾子有還兒之  
善增爾壽三十九年父病尋愈陸又館于他邑一日歸忽有館  
隣女婢泣奔舟欲相隨陸拒之婢將赴水急訪其母家還之并  
告其主速擇良配康熙丙午赴句容途中拾銀一包特留旅店  
候失物者至還之是科場中閱至陸卷彷彿見陰兵無數又忽

現金書三還大字房師異之郎中式

果報見聞錄

吳縣郁進士裴字肇名少爲諸生家貧授徒讀書作文外弗問戶外事順治丁酉舉於鄉時南閩餉緣事發

詔覆試明年集京師試以詩賦頌解郁少不習詩是日詩賦成有古意試春官不第歸仍授徒未幾江南撫臣以誤課綱紳士悉視革郁以註誤名隸籍中憤甚走京師控於部然不攜一錢部勿與直也歸益貧仍授徒讀書作文無少間康熙十六年軍興廣例得賜復會試成進士年已六十五矣性質直無城府遇人無貴賤輒率意與語無飾詞有所拂無愠容然澁於口欲言則曰赤赤或戲之曰先生赤赤也郁怡然再呼之輒應館選名稍毀憤而歸仍館於門生家辛酉春忽病未幾死死之前三日謂子若壻曰夜爲嶽神賜宴命我掌書記若等宜往廟謝又曰

曰昨上帝有使至勅下矣又曰曰頃見攜冠帶至者曰某縣尹  
趣行興從已備我當去遂索筆書一紙付家人投筆而逝先是  
吳郡有范鬚者曾捨身為吳邑城隍隸病疫死死三日心微溫  
後始甦曰憊矣為郁進士起身累我足三日不得停家人叩之  
曰郁為泰安州城隍迎官者皆山東人本縣城隍餞行我攝是  
差三日今早始發舟去而郁適於是日卒

順州  
雜志

康熙己酉江南鄉試宿松令朱維高入內簾取中一卷明晨擬  
首薦夜夢關公謂曰某人不可中因手書一洛字次日忘之以  
卷呈主司初加稱賞忽以筆抹險阻二字朱堅請曰中卷中有  
此字者甚多似不應抹卽命朱浣去及浣而墨漬透數層矣竟

被擯

蕪鄉  
贅筆

崑山徐太翁當明末土寇竊發擄婦女數十人藏于徐氏賊將

他出屬太翁善守之歸苦少一當取汝命賊去太翁各詢其丈  
夫父母家親送還之婦女皆叩頭流血感謝大德太翁亦焚而  
逃矣

國初定鼎土寇削平太翁三子長乾學次秉義三元文皆鼎甲  
八座其門對一聯侍郎尚書都察院狀元榜眼探花郎鄉里榮  
之皆太翁陰德之所報云感應篇

康熙癸未江南士子赴都會試解元某負才傲物陵轢同輩每  
曰今歲狀元舍我而誰同輩不堪其侮既至京師試期且近同  
舍生夜夢文昌帝君陞殿傳臚及唱名則某某狀元也同舍生  
意竊不平未幾有女子披髮呼冤曰某行止有虧不可題多士  
須另換一人帝君有難色顧朱衣神問之朱衣神曰萬歷間亦  
有此事以下科狀元移至上科其人早中三年減壽六歲此因

今可照也遂重唱名狀元爲王式丹旦起某大言如常同舍生  
告之以夢某失色曰此冤孽難逃匪特不思作狀元并不復應  
試矣亟束裝歸半途而卒是科狀元果王式丹也壽六十續子語  
丁酉科龔太史大萬及姚主政梁同主粵西試首題爲斯民也  
二句某房考得一卷甚佳欲行呈薦夜夢一人告之曰此卷必  
不可薦其人三破人婚姻大損陰陽必不售某以夢寐不之信  
乃薦之後復夢其人曰某卷係抄襲陳勾山兆崙舊作窻稿中  
有其文可查也薦而不售其衣巾尚在薦而獲售援新例必除  
名汝雖無大處分何執拗如是耶某以夢白於主司共言吾輩  
識勾山文筆足徵眼力若置前列恐致人疑或遭磨勘附榜末  
應無害也及到部磨勘者復夢如前因以抄襲陳文除名益定  
數果報不可逃也

水曹清  
暇錄

山左蒲留仙好奇成癖撰聊齋志異後入棘闈狐鬼羣集揮之

不去竟莫能得一第

同上

乾隆戊子歲黔中秋闈貴州鎮寧牧山左王石潤執事外場至薦卷期忽傳內場火起驚詢其故知非真火也蓋緣房官某嗜飲日夕時闌入醉鄉秉燭閱卷得一卷文頗佳酒後興狂輒用墨筆圈批既醒知爲誤用深惜而悔然違場例置之案頭弗敢薦也次日晚飯罷主考與各簾官論文之頃而此公房內突然火起羣奔而救至則寂然環相詫異視之案頭有一卷主考閱之竟可中元詢以因何不薦始悉前故主考曰何妨卽作吾圈批者竟領解及拆封填榜知爲蕭鳳翔皆以爲蕭生陰德之報然中後蕭生不認房師而以鬼爲師其亦謬矣

同上

乾隆丁酉陳殿撰初哲與程主政世淳主秦省試程中定二十一

五卷送陳閱內某號一卷紕繆甚多陳欲去之以備卷頂補方  
欲粘簽卽聞鬼聲四起徐至窗外長嘯尋入室中揶揄擾至黎  
明諸鬼乃去陳以考院久無人居疑狐爲祟亦不之怪造程商  
酌去取程聞之大慟失聲言曰先君子皓首科場三經獲雋皆  
以正副主司意見不合抑落孫山之外由今追昔不覺感傷至  
此卷之疵類愚亦見之其去取原無成見第以愚念及之情不  
能禁祈于格外錄之陳勉從其請榜後來謁則祝振聲一村學  
究二公爲厯言其故詢以有何陰騭祝因自敘春夏務農秋冬  
訓課不惟不能爲陰騭亦不知何者爲陰騭固問之乃曰幼受  
文昌陰騭文二十八歲時每晨漱口焚香拜讀一過今五十八  
歲矣行之三十年不倦生平惟有一事他無所知二公曰汝能  
讀卽能行卽此已是陰騭因厚贈之戊戌公車赴禮部試見其



人樸誠無文呐呐如不出諸口其言或不誣也

同上

江南王孝廉晉原博學能文爲南中名宿雍正癸卯發解後終身不赴禮闈人疑而詰之曰余少時與妻不睦妻忿而自經嗣後入闈至夜分輒出相擾卷幅非墨污卽燭燬每試皆然不能終場及癸卯春加意揣摩鍊熟文機入闈日將夕真草俱畢復恐其攘取乃藏東衣內危坐以俟夜分妻至覓卷不可得嘻笑曰爾誠狡矣然今科應中亦爾命也但一之爲甚勿庸再涉妄想明春俟於黃河岸側斷不容爾北渡忿忿而去遂絕意進取終老於家

秋燈叢話

海陽修符赴乾隆庚寅恩科鄉試途遇夫婦二人攜幼子哭之哀異而詰之乃貨富室金將鬻子以償者修惻然曰爾鬻此子猶有他子乎夫婦曰四十餘矣只此一脈計無所出不得不

割愛耳修乃計其所需傾囊與之兩人泣且拜願求姓氏修不告而去及入闈題爲孔子於鄉黨句屬思未就夜夢老人告曰此題作兩扇格必元遂驚覺卽以宋魯分股場後見一人泥首於地視之卽鬻子人也堅請過其家甫入門見壁懸像一軸與夢中叟宛然無二詢之爲乃父之遺像及榜發果登首選上同江南郭生名士也雍正壬子鄉試文機頓塞竟日未及一字鄰號一老叟吟哦自得頃之聲寂俄拍案大呼趨視之卷幅血跡淋漓訝詢其故云三藝成頗自喜忽神倦伏案而寐見二人來引至一處宮闕嵯峨有王者南面坐責吾前世負郭某三千金當酬以三藝驚寤而鼻衄盈卷上矣此行無望但不知郭某爲何如人郭聞之豐然曰我是也取卷面示之名姓不爽叟舉授

郭遂冠多士

上同

蔡寅斗江左名士也公車入都館某氏家其家人物故已久  
唯主母孀居撫一子一女一老僕已歷三世矣誠懇忠靖主母  
待之甚厚僕亦素重蔡名甚喜幼主得師敬禮不替會主母將  
嫁女乏粧奩之貲畿內有田數頃使僕徵其租以歲歉去月餘  
僅獲八十金以歸計之不敷用仍付之曰諺云飯到口錢到手  
零星費去至時愈不足用汝姑收貯待取足總繳可也僕諾之  
而退自念身常出外妻子頑鈍不解事倘此銀有失大事去矣  
乃攜入館中以情告蔡乞代爲收貯時左右無人蔡卽納于箱  
中而鑲之曰汝第去辦正事寄此無妨也僕謝而去又半月徵  
得餘金復命主母索前項僕曰在蔡先生處卽往索之蔡不承  
曰汝那得有銀寄我處僕曰先生無戲言可卽見付蔡怒曰何  
物敢來誣我我爲汝家教子弟豈爲汝家作看財奴耶不遲退

當惹老拳矣僕大驚爭辯不已蔡聲色俱厲卽刻欲解館主母  
聞之立門外揚聲慰蔡曰先生勿氣吾當爲先生責此叛奴蔡  
始不言主母呼僕入痛責之曰先生讀書人且南方名士希圖  
我家數十兩銀耶此必汝將去自救燃眉卒乃誣妄好人吾母  
子孤兒寡婦出門跬步不能行所賴者汝一人耳今又如此尙  
何望乎言訖掩面而泣僕無以自明但自批其頰以自罵是夜  
遂縊死次年蔡入闈精神恍惚下帷秉燭親筆備錄其事於紙  
自述昧心蔑理罪不可逭解帶自經比人知覺體已冰矣尤可  
怪者面壁端坐帶纒去喉寸餘不解何由致死其自供之辭衆  
爭錄之仁和葉省三先生亦錄得一紙每出以示人以爲文人

無行者戒

夜譚  
隨錄

歸安費之達於康熙壬子赴省試與嘉興某秀才同寓佛寺時

寺僧夜夢神告曰嘉興某今科解首也皆相告以爲奇兆未幾有老嫗來寺禮佛倉卒出門遺金條脫及白金二十兩于地某秀才拾得之頃之嫗號哭來迹遺金云我兒負官物繫獄因力貸此物以贖其罪今失去兒其休矣之達廉得其實力勸某秀才不肯之達遂典質衣裝并醵金以濟是秋之達首登鄉薦丙辰成進士入詞館而某秀才以白衣終其身

淮海遺聞

顧君諱玉林居太倉州城東乾隆辛丑年十七爲弟子員有友喪父貧無以殯顧君慨然任之數夜夢其父曰必報德癸卯秋闈初作文見一人立于前以已之無愧也不之懼至晚挑燈恍惚落卷拂之無所損神思汨汨而來偶出溺硯覆卷倉皇捧起墨瀋汚稿數字如塗改節奏恰合遂因之不易後歸家夜夢友之父曰君今獲雋矣余煞費苦心也遂以薦中七十四名

青浦陸某應省試舟泊吳門聞岸上失火聲旋見一裸體婦投  
入舟陸亟擲以被使裹之飛棹還家告其妻而以衣衣之問所  
親去金匱三里母家在焉於是更買舟佐以小婢連舸並進暮  
達吳門訪母氏而歸之試畢登賢書謁房師于武進一孝廉先  
在坐師以陰德叩辭固問之具詳歸婦事在坐者泣下稽首曰  
不有今日幾以醜德污君也向者樓焚失婦遇于舅氏裸而往  
衣而歸不可問矣棄諸其家今而知某之不德也歸必逆之夫  
一念之正上通于天乃巧爲之緣以雪其事神哉同上

溧陽馬珩聲之父臘月散館歸家得束修二十金以了夙逋鄰  
有負債莫償將粥其妻離異痛哭馬廉得之欲代贖價須四十  
金修脯僅得半因商於湖州米客米客慨然亦出二十金助之  
夜夢其先人曰汝何不賣屋而獨償之今一舉人各分其半矣

春水居筆記

無錫顧鉅乾隆丁未科會試入闈假寐間見一人索卷大書一惜字而去及醒題紙已到文思沛然首藝援筆立就但覺篇幅太短欲增不可得乃即初稿錄之榜發竟以是科中會元始悟太翁敬惜字紙之報蓋太翁平日勤于惜字也

紫垣隨筆

常州趙恭毅公諱申喬

國朝名臣也平日最敬惜字紙康熙庚戌科會試卷爲墨汚恍惚一人以袖拂之墨跡遂去大異之是科卽中式後官大司農謚恭毅子熊詔己丑狀元今內閣中書懷玉其曾孫也  
雍正丁未科會元長洲彭啟豐殿試呈卷則武進莊柱在第一彭在第十也

上以前兩科榜首俱出江南閱至第十卷字跡殊邈疑必爲邇

省人遂改置第一及臚唱乃知彭仍是江南人彭固會元又復  
大魁一時傳爲佳話初莊母太夫人夢三神人議鼎甲事曰陰  
德莊與彭適相埒惟惜字一節莊不及彭奈何一神人曰卽改  
彭爲第一人可也醒而異之及殿試錄至始知前夢不妄後莊  
與彭遂締姻焉莊自是勤于惜字兩子俱中鼎甲長存與乙丑  
榜眼次培因甲戌狀元

同上

武進劉在東雍正乙卯應試北闈夢神人語之曰汝命本薄因  
汝存心惜字且勸化多人今年應得一科幸自勵是科卽中式  
自是惜字愈勤館天津倡舉惜字會會中人無脫科者次子芳  
壬申副榜癸酉舉人孫印全辛卯壬辰聯捷弼全丙午舉人

同上

興化徐步蟾乾隆丁卯科江南解元也是年科試無名錄遺亦  
無名時已八月初將買舟欲歸矣偶與友某過懷清橋關帝廟



見神前一紙包拾而視之白銀二十兩也意候失主還之友曰  
迂矣汝不取可與我遂奪銀去少頃一老嫗奔趨至遍覓無有  
淚如雨下徐在旁逆知爲失銀者伴問之曰爾何悲老嫗曰吾  
夫爲讐人所陷身坐囹圄昨書吏來索二十金可免罪今鬻一  
女得銀二十冀免夫罪而又恐吏之誑我也故至此卜于神不  
料銀在袖中已失去枉鬻一女而夫罪仍不能免是以悲耳徐  
惻然曰爾銀我所拾也隨我去當還汝至寓適友人已將此銀  
輸去大半餘銀亦不肯還公不得已檢囊中考費十餘金不足  
稱貸于同寓友合二十金與之老嫗叩頭泣謝曰相公積此陰  
德當爲今秋第一名解元徐笑曰吾豈望報乎亦行吾心之所  
安而已後得入闈果中第一

同上

左藻桐城縣監生初不事舉業貿易蘇州買婢爲女從嫁婢容

端重問其祖父婢泣曰我祖上七代進士今父欠官糧無償不  
得已賣我耳藻聞之惻然因曰暮閉女室中已乃邀同寓博戲  
達旦隨送女歸其父母不取原值復與銀釧一副認爲已女囑  
媒爲擇良配其父母泣謝藻父在家夢冠烏紗七人謝曰汝子  
有陰德奏聞上帝賜伊一榜醒疑之頃復夢如前藻歸父問其  
有何陰德藻乃述前事父告以夢值康熙癸酉科場促令赴試  
藻遂入場及試題出藻悶悶而寐夢冠烏紗七人來每人抱藻  
手寫文一篇藻醒見文已寫畢遂交卷三場皆然藻中式六十  
三名高郵沈仲嶽述其事

信心錄

金甌誠敬惜字紙凡遇遺棄字跡必拾之有染穢者則滌之焚  
灰投於河中如有年一夕夢文帝召甌至殿前傳命賜以功  
名次日適有友邀甌赴童子試始閱書便能自解悟遂入泮後

倍加敬惜刊施惜字紙文達人勸化如是又二十年甌子相年  
十六爲諸生二十一歲中雍正丙午科解元聯捷進士入翰林

同上

查宮詹昇浙江海寧人字聲山一字仲韋康熙丁卯鄉舉亞魁  
戊辰成進士授翰林編修己卯典江西試事受

命之日不留不處單車就道入棘闈集同考官十三人焚香誓  
天曰某二十年備嘗舉業之苦敢負初心今與諸公約務期矢  
公矢慎搜羅真才有違是言殃及再世每得一卷必反復推勘  
得佳卷欣然擊節卽遇不愜意者亦未嘗奮筆塗抹必對本房  
商榷本房所言有當轉從而賞識之試錄序云不敢憑臆見以  
矯異不敢徇衆論以黨同乃述實也撤闈後遠近翕然稱得士  
盛德若此宜其後人掇巍科享厚報焉

劍潭  
雜述

宮詹幼稟庭訓事事躬行實踐虔奉斗齋嘗自書感應篇後跋云余年二十四患目疾遂失明醫藥罔效因奉斗母並受持太上感應篇朝夕不輟如是二年目漸還明迄今二十有七年矣去秋奉

命典試江西夙夜盟心不敢一毫苟且聞中恍惚夢神臨舉子名次皆若神與默定者余心益敬畏持誦愈虔今值庚辰元旦朝賀回寓齋沐書此以勸世之有同志者宮詹生平著作有姓氏譜靜學齋詩稿尺牘偶存俱未刊行惟五瑞詩塞上詩已鏤板書有孝經感應篇蘭亭考山居篇天台賦陰符經聖主得賢臣頌各帖流傳於世

同上

槐廳載筆卷十七

國子監祭酒法式善編

詠歌一

康熙間太學生周清原有詩名大學士馮溥見其雍試諸作目  
爲奇才詩以贈之曰尊酒高齋話夕曛斗間佳氣識龍文十年  
閉戶遲遊洛千里過都早不羣春草已看傳白傳飛花定見詔  
韓君

九重側席今方切振筆蓬山爲爾欣後清原果以博學鴻詞授  
翰林清原雍試諸作有太學白丁香詩句云月明有水皆爲影  
風靜無塵別遞香一時傳誦都下上達

宸聽比官翰林

召見

上猶誦其詩句獎之

國子監志

康熙二十六年丁卯八月初八日余偶入江寧送兒子威寶赴棘闈主試者米翰林漢雯也舉子才黜名忽聞空中聲勢洶湧仰視見飛蝗蔽天自東北來日色爲其所掩經過之處屋瓦層疊數寸有客從江北至云初七晚蝗至浦口是日上午至白下城旋渡江兩岸蘆葉俱被食盡時有童謠云蝗虫入考場有米也要荒米君素有才名竟被黜

三闕識畧

順治丁酉科以江南試場榜發諸生哭於文廟有以首題作爲黃鶯兒歌之者其詞曰命意在題中輕貧士重富翁詩云子曰全無用切磋枉工徃來要通其斯之謂方能中告諸公方人子貢貨殖是家風

上聞并北場皆嚴處分

雞窓刺言

彭而述楚闢校士詩云篝燈灑灑映高幃栢老虬龍膩葉稀缺  
壁高臺燐未散荒簷古瓦蝠初飛十年夢冷雕蟲技四月江乘  
黃鵠磯誰謂洞庭衣帶水猶遲聲教未言歸

讀史亭詩集

康熙十七年戊午秋七月十日試庶吉士

上出秦漢文一部裝潢精美備出題之用恭紀每羨龍文被石  
渠五雲清切啟函初誰傳蠹食神仙字喜值題逢天老書雨滴  
梧桐秋色淺香浮甘露齒芬餘

先是

上命

內閣日備清茶鳳池珥筆光華

盛一曲陽春笑子虛

佳山堂詩集

七月十一日

上幸內閣閱庶常試卷應制秋色分東壁奎光暎紫微

皇情逢暇豫文苑奉

恩暉麗句珠璣湧鴻章道德歸縹緲

聖鑒常傍五雲飛

同上

熊伯龍永平久旱試士日微雨志喜詩云棘院倚幽岑前山一  
雨臨花枝隨意濯書幌密來侵帶景開光燄含風和苦吟終期  
霖可作慰此望雲心

敷詒堂全集

自宣府之易州校士宿紫荆關詩云蔚羅南下踏雲烟冀野真  
稱地利偏路轉千盤難恤馬時當六月又行邊

客歲亦以季夏試宣府

頻

呼雨漲公無渡但見烏栖我自憐危嶺荆榛還叱馭楚人藍縷

已三年

同上

湯斌戊午應

召入都留別里中親友詩云蕭然蘿薜絕雙魚雲外忽傳有鶴  
書學道原因息翮早出山翻悔避名疎幽花谷口遙相映野鷺  
溪邊迥自如龍尾班行真濟濟拙庸應許住茅廬簇簇郊闌擁



畫輪臨河握手話酸辛  
藝花選石多同調  
待漏鳴珂少故人  
倦鳥寧能厭遠岫  
歸雲何意覆通津  
入

朝倘得辭簪紱  
春水還期理釣綸

湯子遺情

秦松齡應

詔北行途次和孫友詩云  
長途觸熱走踈踈  
老友扶攜各愴神  
軍府元瑜羞筆札  
公車曼倩倦風塵  
憂時尚屬艱難日  
應

詔都非少壯身  
溪上釣磯安穩在  
可憐烟雨隔通津

蒼峴山人集

李天馥題沈繹堂太史殿廷橐筆問門賜貂二圖時太史侯補  
郡丞詩云  
頻年待詔隱神仙  
此日欣聞內殿傳  
逸少自書三

藏序無煩

聖代集金錢興時文字肆旁求  
見說清平屬隱侯  
賦罷

至尊含笑閱  
尚方親賜黑貂裘  
珍貢新裁宮樣寬  
濃雲拂鬱日

光攬著來出入承明殿多少行人夾道看史館三長舊絕倫書  
來錦帙五雲新可憐十載遊梁客原是

先朝獻賦人

容齋集

正月廿一日

上御懋勤殿

召郎中臣王士禎賦詩賜譙

授以侍講遂

諭中外臣僚各舉所知恭紀四律詩云賦奏明光愛子虛一時  
盛事紀相如

朝廷正厯賢良對公府爭修辟召書牧豕難安東海上驚猿應  
悔北山初從今徧給尚書札不使崇文美石渠側席旁求

勅有司新科博學復宏辭除書原不循常貫肆志如今未可爲

孰謂劉君終下第却令張季悔高貲鵬搏鵬運知多少都覓項  
玕集鳳池黃金初築競彈冠應

詔毋爲著說難露布饒歌邊燧飲蒲輪纁帛

帝紘寬詎惟經學參同異會有書生策治安正是五星奎聚候  
少微長映上台端力能尊顯趣從遊續食何煩物色求祗爲

宮中思屈宋頓教車下拜巢由三珠池影冥鴻落雙匣霞光寶  
劍收白虎宏文皆異數儒生何必憶封侯同上

陳廷敬禮闈校士得十四韻詩云數到掄才地承

恩自禁林纔移經席仗猶殷屬車音白首冰銜晚青春鎖院

深昔遊思短褐榮路愧華簪銀燭三條盡銅壺午夜侵苑花應

冉冉闌棘自森森簾下經過斷風前語笑沉樓明金榜月臺轉

玉衡參

地鄰觀象臺

屢輟中宵夢回憐傑直心香凝新繡網寒戀舊

稜袞忝竊繁文字蹉跎細討尋池邊蹲豈鳳書裏穴成蟬典職

堪遲暮登賢鬱滯滛不辭鈎校切有暇得微吟

午亭文編

王士禎奉

命典會試二月初六日

賜宴禮部詩云郎官列宿記當年重到南宮尺五天滿座金貂  
霄漢上幾叢羅綺舞筵前八公相鶴希真賞一代登龍愧昔賢  
弱歲計偕今白首承

恩楚憶舊青氍

蘇尾集

閨中詩云一半青春在鎖闌韶華客思兩依依燕知社日遡巡  
到花滿春城厯亂飛敢謂進賢蒙上賞只思沽酒解朝衣檐牙  
曉日聞靈鵲檢點金花

御苑歸

同上

放榜詩云銀燭青煙徹曉明曙鴉聲散九重城高風鷗鶚扶搖

起春水魚龍變化生仙掌凌空干氣象湘靈鼓瑟擅才名書生

報  
國從今始取次煙霄第一程同上

嚴我斯甲辰傳臚日紀

恩詩云旭日累恩霽色開鴻臚聲徹殿頭來香飄御案初承

詔酒賜天厨正舉杯綵仗氤氲喧鳳吹康衢蹠蹠走龍媒自

慚拜獻無長策敢忘經生舊草萊尺五堂詩刪

國子監釋奠恭賦詩云朱甍碧殿迥嵯峨檜栢森森隱玉珂委

珮庭前陳俎豆環橋門外擁絃歌

恩叨醉酒丹霄上座想橫經翠輦過大司成置酒堂東偏各獻酬三爵以堂中曾駕

臨故聞說大平崇禮樂祗今薄海盡投戈同上

已酉校文山左次陽明先生原韻詩云金門方朔本浮沉八月

秋風客思深海內幾人求駿骨匣中雙劍忽龍吟文章有用期  
千古得失難知總寸心聞道姚江衣鉢在清宵危坐費追尋歷  
下亭邊海氣沉蕭蕭鎖院正秋深名山不朽青蓮句大雅猶存  
白雪吟魯國兩生今日重漢廷三策舊時心濟南共說多名士  
許我停車次第尋

同上

乙丑閏中次韻五首詩云 丹詔求賢切清時拜獻頻

九重懸藻鑑什襲重儒珍士有登龍望才誇吐鳳新廿年空躑  
躑孤負上林春秘閣傳

宸翰黃封下禮曹骨收千里駿相取九方臯 御苑風雲集天  
衢日月高經綸須大手珍重呂虔刀侵曉攤書坐當軒樹影鮮  
右文

昭代典吾道幾人傳辛苦三千士瞻依尺五天持衡公等在須

著祖生鞭鎖院人初散空堂月二更青燈思往事白髮笑浮名  
臺迥星河近城高畫角清春風桃李發吟眺一含情共有憐才  
意中宵起浩歎何人工抱瑟有客笑彈冠霄漢逢年易文章報  
國難由來天下士不厭布衣寒

尺五堂詩鈔

熊一瀟出閣贈募鶴鳴中丞詩云拜捧

丹綸出紫宸雲霞萬頃大江濱掄才敢忘三秋舊敷命廻瞻五

夜新豈我文章干斗象知公經緯動星辰

首場魁星示異

盛朝黼黻需良彥陶冶真憑社稷臣

浦雲堂詩集

勞之辨聞事告竣便道省覲述懷詩云天下離別多無如宦遊

子憶我象勺時晨昏依怙恃弱冠則賢書通籍金閨裏屈指歲

月徂浮沉閱一紀郵書托鱗鴻奉養虛甘旨往歲改曹郎需次

曾旋里鯉對共潘輿天倫樂無比泊乎權津門嚴君遠至止尚

憾隔慈顏北堂疎省視今年秋八月奉

命衡多士

主恩出意外隕越引爲耻南國滿才駿狂瀾亦須砥江水照臣  
心臣心白于水工歌鹿鳴三卒衛事方已尤幸秣陵道維桑近  
如咫暫歸謁寢門百拜長跼起承歡餘兩袖老親爲色喜珍重  
噶加餐躊躇及行李王程敢淹留挂帆徒徙倚

靜觀堂詩集

張英二十四日聽

恩詔詩云當軒鳳藻太平春學士冰銜紫誥新慚愧江南圭竇

客絲綸四代作詞臣

詔贈祖父皆翰林學士時廷贊亦官翰林編修

存誠堂詩集

祖父贈光祿公恂所府君每聞鄉人言其厚德仰之如祥麟威  
鳳方伯公已酉登科邑人榮之贈以聯曰張不張威願秉文文  
名天下盛有盛德期可藩藩屏王家今桑梓以爲美談

篤素堂文集



徐乾學赴京兆宴入棘闈口占詩云

聖世巍科錄異才詞臣聯騎瑣闥來春曹捧

敕羣官侍御路簪花京尹催九陌和風搖玉珮滿堂晴月瀉金

蠟三年兩度叨恩宴鳳闕紅雲首重回

惜園集

闈中卽事呈太傅宛平公成少司馬鄭副憲暨分校諸君詩云  
鳴騶此日鎖闈開十六年前騎馬來文運正欣逢泰盛

君恩豈易荅涓埃兩行樺燭看傳鑰一縷新蟾照舉杯懷槩欣  
陪丞相席聯裾真讓列卿才春風寂寂敞虛堂  
禁苑連砌玉  
筍行授簡風流存著作埋輪中外仰封章感

恩報

國寧無意識曲搜奇定有方落盡繁華都不管迢迢清夜靜焚

香

同上

李光地七夕督學政至通州詩云連旬傾暑雨天意誠若何北  
地惟愁旱傳聞不厭多傷哉漳滏濱頻歲沈驚波高土猶自可  
下游勢則那我來坐深院雨脚亂如麻文場時滿展絳帟手可  
援中宵七夕響星漢漫平沙云何裨野事祲精爲擊摩芃芃苗  
黍外庶以育菁莪雲霖道苦遠心跡只藤蘿

榕村全集

韓莢方靈臯解元落第二首詩云南國才名早擅場情知抱玉  
劇堪傷春衫底泥萋萋色只欠新來時世粧著書端合在窮愁  
歲歲饑驅也倦游南面百城門兩版期君小試作三頭

有懷堂詩稿

顧俠君孝廉病不及終場太息其去詩云白蓮千朶爭文戰忽  
退三舍收勒韞似有揶揄來掣筆亟脫麻衣筆仍健早別春明  
二月春柳似含顰花欲濺請看壓倒元白人明月未投玉未獻

同上

送張日容孝廉下第歸里詩云去去休論刀劍傷一時拍板擅

詞場旗亭唱徧弓衣織折得身如燕子忙

同上

王鴻緒主京兆試闈中示同年韓慕廬詩云北溟起鯢鵬波浪  
濶萬里忝司文衡柄旦旦誓諸水刻厲衾影衷蕩滌脂膏累祇  
恐五色迷未足厭多士銀燭燦風簾隄糜列斐几魚豕混莫讐  
甲乙雜難紀間得沙中金盈握竊共喜桃蹊詎敢私衣鉢何妄  
擬惟求神奧區殖彼桐與梓斷爲琴瑟材揚音清廟裏回顧三  
年前矮屋兩脚倚伸紙筆不休懼遭有司否短翮翔青雲內省  
常類泚濫先粉署賢謬筮昌黎子庶幾金臺上蹠蹠皆駮駟

山人集

徐倬查夏重下第後以詩見投余約之同行因和其韻詩云料  
量身如一葉輕敢將樵牧傲公卿笨車那用三騶灋池草還留

兩部鳴白袷烏巾仍舊服紅蘭綠芷足前程與君宿昔稱劉阮  
且共春帆問赤城楊花作雪路茫茫結伴青春返故鄉蛩蛭相  
依原自合蜨蜂趁逐也能狂罷官滋味沙糖好下第情懷刀劍  
傷東野下第詩棄置復但得閑閑十畝在君栽黃竹我栽桑道

稿堂類

津門聞顧子書宣及第詩云上林小燕語呢喃名紙啣來到客  
帆半載愁眉今破笑茶甌翻落浣青衫同上

彭定求乾清宮

御試紀

恩詩云乾曜瓊霄麗奎文紺宇明廣颺依

聖藻陶鑄切

皇情秘殿初分牘

真人又秉衡

恩同宣室召

寵倍上林行瑞鶴開中禁祥烟儼太清  
凝神瞻肅穆垂拱仰昇平松棟雲方縵  
虹梁景正晴丹書呈有象銅漏聽無聲  
綳帙窮三篋瑤函富百城諭廩供內府  
象管給延英硯滴蟾蜍潤箋披錦穀生

賜餐皆玉饌吸茗是金莖喜接

天顏霽深叨禮數榮夕香聞麝液霄燭見  
蓮檠積雪消驚瓦春星轉繡甍十年曾  
釋鴈茲日勝登瀛每愧雕蟲技真慚倚  
馬名菲葑寧有棄葵藿亦知傾式序隨  
仙露傳歌和早鶯願言勤砥礪長此荷  
裁成

南韵詩集

張榕端禮閣分校次掌院陳澤州相國韻詩云泰運開皇路

春光滿上林築臺收逸足幾木待知音珥筆才誠忝衡文

眷特深昔年懷素槩此日逐華簪列棘規宜肅分曹職戒侵時  
和風習習院靜景森森戶鍵人聲寂牕虛月影沉良朋宵聽漏  
高論曉移參鈴閣回殘夢風簷耿寸心敢淆碯與玉寧愧影和  
衾帳秘曾提誨薪傳更討尋騫騰思吐鳳潦倒念枯蟬案句空  
耽癖研書任詭淫載歌池上曲雅志續微吟

寶齋堂詩稿

張廷瓚辛酉八月初一日

召見庶吉士于瀛臺午後試于太和殿蒙

恩授館職恭紀詩云雙闕嗟峨禁苑西秋風太液水痕低絳  
綃萬疊花圍浦碧玉千重柳覆堤日麗龍文開寶幄雲生雉尾  
上丹梯自驚初入長楊館名姓親勞

聖主題

傳恭堂詩集

汪晉徵已未二月十五禮闈玩月詩云月屆闈中滿文成筆底  
圓典謨昭奕代藻采耀當年豈爲虛名重應思濟世賢光輝盈  
宇宙相對思悠然

雙溪草堂詩集

丁卯奉

命校士三楚初秋朔出郭詩云

帝城遠不遠山色倚雲屏野水過橋白墟烟遶郭青古槐臨上  
道高柳拂離亭萬里行行始愁人候使星

同上

李孚青閏五月初四 瀛臺

御試賜宴恭紀詩云螭頭晴旭映瞳隴天際瑤池一望通渡盡  
蒲灣齊肅立泠泠仙樂五雲中饌玉豐盈出大官華裊藉地坐  
來寬

殊恩獨念舒長日中旨還宣恣飽餐水殿荷風香滿襟長廊無

暑竹林深

天顏咫尺含毫怯未敢掀髯肆朗吟黃帕瓊觴

賜日斜真從天上酌流霞沾唇已勝金莖露猶有頭綱八餅茶  
安穩蘭舟兩漿輕垂楊夾岸晚波平紅霞一抹明金碧如在仇  
英畫裏行碧藕冰桃泥露滋歸鞍珍重馬行遲入門先發青絲  
籠也使

恩波及婦兒

野香亭集

彭孫通和院長陳說巖先生禮闈司考十四韻詩云幸際

昇平暇追陪翰墨林掄才需哲匠抽思發清音幻眇移情甚留  
連託興深瑤華呈國寶玉筍豔朝簪鎖院春陰靜垂簾暮色侵  
風鈴聲斷續月樹影蕭森乍煖爐烟潤餘寒漏箭沉簷虛初候  
鳥時分前一日天迥欲橫參荏苒青雲夢蹉跎白首心所期同緩帶



敢使獨慙衾永夜仍無寐遺編得自尋百年同野馬三食亦仙

蟬文起齊梁弱詩刪鄭衛淫

時予分授苑經

濡毫一言志重此繼高吟

松桂堂全集

和少司農李容齋先生禮闈司考詩云偶此蓬山逐陣行十重  
仙署列嚴更曾分天上紅綾倅再聽人間白雪聲卿月乍看垂  
照迥臣心不待飲冰清當年得御真多幸肯向青雲一借名早  
將彩筆闢宏農萬象雕剗間氣鍾手植桃蹊迎化日口噓黍谷  
轉嚴冬浮沉只似湖中雁忝竊還隨柱下龍爲染吟牋一相和  
院門深掩夕陽封

同上

王頊齡六月六日奉

命典試闕中出都李丹壑徐虞門嚴漢茂家兄后張弟薛澱甥  
周冰持送予郊外口占志別詩云諸君送我出城闌惜別依依

欲愴神余亦此間常送客十年折盡柳條春

世恩堂詩集

陳維崧咏翰林院中古蹟次尤悔菴二首詩云黃帕低籠雪藕寒

九重分賜遍長安

時以賜藕入院

滌來院吏尋冰井踏處墻陰觸石

欄瑟瑟銅瓶苔影薄涓涓碧鬢葉聲乾玉堂舊事知何限欲溯

風流想像難

右咏劉井

瀛洲誰料尚能來藥院荷潭面面開聞說前

朝柯學士種將雙樹傍空臺蒼皮繡甲參天質嘯雨呼風不世

才爲撫茶陵遺墨在索鈴掣罷首重回

右咏柯亭

湖海樓全集

朱彝尊正月二十日

召入南書房供奉詩云本作漁樵侶翻聯侍從臣迂疎人事減  
出人

主恩頻短袖紅塵少晴牕綠字勻願爲溫室樹相映上林春

亭集

恩賜 禁中騎馬詩云魚鑰千門啟龍樓一道通趨翔人不易  
行步馬偏工鞭拂宮鴉影衣青苑柳風薄遊思賤日足繭萬山

中  
上同

汪琬聞薦舉

詔言志詩云菟園冊子在牀頭自分迂疏不足收賈董高文姑  
撥置可能詞賦類俳優久忘箋傳語云何蠶譜農書記憶多腰  
了一鐮肩一笠只應赴箇力田科曾學雕蟲苦未成讓渠班馬  
獨專名白頭願作邨夫子一卷蒙求聚後生鄰穉謹闕野父驚  
爭傳軒騎枉柴荆此翁漸被時賢識悔不從前換姓名紙窗竹  
屋栖遲穩絺帳桃笙偃仰寬慙媿暮年真大黠不曾西笑爲長  
安松黃半落柳陰深緩步前邨頗慙心莫笑吳音殊未正也能

擁鼻作長吟

鈍翁  
積案

潘耒膺薦寫懷詩云緯蕭抱甕一閒身忽報徵書訪隱淪客到  
定知傳語誤牒來方訝姓名真雕籠豈得呼高鳥芳餌何當近  
逸鱗閉戶莞然成獨笑南山翠色正嶙峋土木形骸臥竹根一  
生無夢到金門梁鴻早歲耽棲遯何點中年薄宦婚櫟以不材  
留作社瓠因無用取當樽少微那得關星象錯比柴桑處士村  
多謝雲霄鶴鷺行聯翩推轂有封章只言牛鐸堪諧律詎料鉛  
刀已挫鉞元子曾聞薦謙秀巨源終不强嵇康此情可待披襟  
說欲寄蒲箋鳥路長萬事都緣不耐饑賣文作活計全非定僧  
豈合持齋鉢處女何當辦嫁衣橘彈千林霜帶屋魚苗十斛水  
平磯逍遙雲路餐風好莫逐光青拾地肥爛溪斜引霅溪流一  
派香風齒舊秋早悲晚菰園客舍綠簑青笠水仙舟識時何物

稱龍鳳混俗從人喚馬牛遮斷白雲三十里莫教空谷有鳴騶

送初堂詩集

施閏章應

召入都留別親舊詩云林壑

君恩重棲遲鶴髮新心將同木石名敢玷絲綸黃閣憐知己青

山解笑人匡時計疎闊多恐負 楓宸闕門真

聖主 禁院富羣賢半豹吾何意離羣世偶傳生涯餘藥餌嬾

臥信江天舊侶應相憶東峰夜月圓休沐非歸隱山田薄且耕

時艱須管葛祖德舊周程衰謝看才盡關河觸暑行不知宜室

召何策對

昇平烽烟猶未息山澤忍安居白髮千行淚輕裝數卷書

聖朝容老拙野性稱樵漁却笑從前事無端賦子虛

學餘齋詩集

大梁試院中秋夜同劉怡齋吏部詩云汴宮遺跡舊淒清永夜  
論文露氣生忽見月圓知令節誰禁歌罷動鄉情閒從河畔看  
銀漢遠憶江關歷鳳城池白渾疑梁苑雪共君拚把玉樽傾上同  
贈別同考諸君詩云鄴下詞人曾聚難辛勤旬日接清歡相知  
懷抱然疑絕苦愛文章慘淡看合坐風簾摧燭短倚樓秋月照  
人寒金門握手前期在惜別芳尊興未闌上同

丁酉三月十九日余初至東萊校士唱名畢雷雨大作平地水  
尺餘霽聲洶洶如崩屋諸生皆雲集堂上不復得試是時苦旱  
久矣書口號以壯多士云滿口明珠絳帳開久晴一日走風雷  
敢言化雨隨車至應有蛟龍出海來咫尺蓬萊山可移雨師風  
伯颺靈旗從教滄海添春漲曾取珊瑚百丈枝諸生和者十餘  
人高密王颺昌最見賞異後官至少宗伯蘧齋詩話

學政故事諸生非先期告老臨場概不得請及試其文常八九  
黜余校士青州旣鎖院復有三叟乞衣頂憐而破例許之日中  
未得出與以酒食偶作詩云一領青衫兩鬢班春風特放此身  
閒掉頭歸去休惆悵無恙相看是舊山同上

徐鉉應

詔入都呈司農公詩云煙雨常思笠澤灘徵書忽枉到漁竿破  
琴欲擊嗟桐爨短策曾羞笑籜冠上駟誰能過郭隗寸心只欲  
擬任安從今自合雕籠住且向車茵一醉彈蘆中竈下感恩私  
豈有才名

聖主知薦達已慙司馬賦飢驅猶誦杜陵詩絳紗入座晴雲迴  
紅豆當歌畫漏遲欲向上林誇羽獵鷓鴣敢借萬年枝

南州草堂集

方象瑛癸亥七月一日出都詩云五載承

恩久今朝奉 簡書敷文

天子意論秀太平初

以冠亂三科未舉鄉試玉是始補行

早識蠶叢險寧辭鳥道

紆從來期許志肯負此征車秋色

皇都早迢迢事遠征五年

繙史乘

時奉纂修明史

命萬里數郵程巴蜀人才數淵雲絕代英求

賢知不易篝火記平生

健松齋集

毛奇齡午門謝

恩恭紀詩云嵯峨間闔啟雙鑲

帝闕遙看綵仗班伏地敢違階咫尺瞻天只在殿中間楓門劍

珮朝方啟草野衣冠拜未嫻但愧

聖恩無可報遙呼萬壽指南山

西河詩集

家明府際可以徵召赴

御試下第還任祥符爲此送之詩云宜春門外柳絲長欲綰雙



輪返大梁祇爲漢庭尊吏治不將王吉作賢良蕭風冉冉動高  
旌空道宏詞繼永貞篋裏文章雄八代當時猶失退之名同上  
嚴繩孫拜

命後作詩云久爲迂疎憶薜蘿職司清切更如何百家同異源  
流遠一德都俞記載多惜學豈堪參作述承

恩始自悔蹉跎筋驚肉緩平生事愁問花甌日影過秋水集

吳雯李湘北閣學有

聖代求賢之作傳和紛然酒次出以見示余白揆謏劣何能揚  
扈

盛事但自述所遭而已並呈先生詩云逕開黽黹學隣虛巖壑  
朝朝信所如

聖代自多優異詔微才真媿治安書觀光未敢違先達作賦還

當念遂初回首舊山冷猿鶴桃花流水亂春渠故人清切白雲  
司愛我陽春郢上詞苦欲上書共徐樂不教下第歎卽爲陽居  
久矣忘爭席司馬何須更入貲看取凌雲新賦好幾人先到鳳  
凰池鄉里常隨馬少游上公偏有白雲求可能輦下留方朔  
先是人間笑許由草野邨知千古事

朝廷自有八紘收玉杯漫道天人策牧豕公孫萬戶侯

蓮洋集

田雯壬子順天分闈卽事詩云京兆承  
恩重詞臣拜

詔來宮花迎寶幄釣樂佐霞杯玉勒香塵動珠旗日影迴簾幃  
分鑠院燈火映高槐乙夜青藜合長天水鏡開五經叅博士十  
駕擢英才鷹隼隨風下璠璣入手裁旁求收竹箭翦拂走龍媒  
冰鑑歐陽陋春鞭祖述催敢忘辛苦地

盛典書冊古微